

TAGI



CHAPTER 1

Sa dabe galili tiko na koro E a sinai kina na tamata e liu! Sa vaka na yada o koya E a kilai levu vei ira na veimatanitu! Na raluve ena nodra vei yasana Sa yaco me bobula!

² Sa tagi vakararawa ena bogi, Na wai ni matana sa tiriva na baluna; Ena kedra maliwa sa vinakati koya Sa sega, me vakacegui koya; Era sa kena meca kecega.

³ Sa kau vakabobula o Juta, Sa vakararawataki, ka sa lewai na nona cakacaka; Sa sega ni kunea na vakacegu; O ira kece sa beitaki koya, era sa siviti koya ena vanua dredre ka qiqo.

⁴ Na gaunisala ki Saioni sa tagi Ni sa sega e dua sa lako mai ki na solevu, Era sa lala kece na kena matamata; Era sa cegulevu na kena bete, Era sa vakasaurarataki na kena goneyalewa, Ka sa vakasewasewani vakalevu sara.

⁵ O ira na kena meca, era sa yaco me nona turaga O ira na kena meca, era sa tamata yaco mai; Ni sa vakararawataki ira o Jiova, Ena vuku ni sa rui levu na nodra talaidredre. Era sa kau vakavesu na luvedra ena matadra na meca.

⁶ Vua na goneyalewa ni Saioni, Na kena i rairai vinaka kece sa yali, O ira na ravouvou sa yaco me ra vaka na me kila sa sega ni kunea na kena. Era sa dro, ia, era sa malumalumu ga e matadra na dauvakasasa.

⁷ Ena veisiga kece ni nona vakararawataki kei na nona veikauyaki, Sa dau nanuma o Jerusalemi na nona veika vivinaka kece sa dau tu vua ena veisiga sa oti, Ni ra sa vesuki na nona tamata ena ligadra na meca, Era sa raici koya na meca ka era sa vakalialiai koya, ena nona sa vesuki.

⁸ Sa rui sivia nai valavala ca nei Jerusalemi ka sa yaco me boi ca sara, O ira na dau rokovi koya, era sa cati koya, Baleta ni ra sa raica na nona luvaiwale; Sa tagi ga o koya ka gole tani.

⁹ Sa duka sara vakalevu na nona liku, Sa sega ni raica rawa na vanua e lako tiko kina; Sa ka vakaloloma na nona mai tavutu; Sa sega ni dua e mai vakacegui koya, "I Jiova, moni raica na noqu vakalolomataki Sa vakacerecerei na Meca!"

¹⁰ Sa dodoka na ligana na meca me tara na nona ka vivinaka kecega; Ni sa raica o koya na nodra sa curu mai ki na vale tabu, o ira sara ga o a ni tukuna kina, Sa tabu ni dua e curu kina" ki na Nomuni soqosoqo tabu.

¹¹ Era sa vakararai kece na tamata, Era sa vakarai madrai; Era sa solia na nodra i yau talei me voli kina na madrai, me ra bula kina I Jiova, "Moni raica ka vakalewa Ni'u sa sega ni ciqomi."

¹² "Sa sega dina beka ni dua na ka vei kemuni oqo? Oqo, moni raica mada, ke sa dua na rarawa me vaka na noqu rarawa, sa kau mai oqo vei au, o koya sa vakatara o Jiova ena

sigā ni nona cudru katakata.

13 "Mai cake, sa tala mai o koya na bukawaqa ki na suiqu, Ka sa vakamalumalumutaki ira; Sa tevuka o koya na lawa me corita na yavaqu, Sa vukici au lesu; Sa cakava me ka wale, ka au sa rawai ena siga taucoko.

14 "Nai vua ni noqu talaidredre sa vauci, Era sa tali vata ka viritaki mai ki na domoqu, Sa cakava ogo na liga i Jiova. Sa vakamalumalumutaki au o koya; O Jiova, sa soli au ki na ligadra o ira au sa sega ni veivorati tukuna.

15 "O Jiova sa butuki ira sobu na noqu tamata qaqa ena ruku ni yavana; Sa kaciva o koya e dua nai soqosoqo me vala kei au, me qaqi ira na noqu tamata bula. O Jiova sa butuki ira sobu na goneyalewa sega cala ni Juta me vaka mai na vale ni vaini.

16 "Ena vuku ni ka ogo, au sa tagi kina, Sa drodro vakalevu na wai ni mataqu; Baleti koya na noqu dauveivakacegui, o koya e dodonu me solia vei au na bula, Sa yawa mai vei au. E ra sa dui dro na luvequ, Baleta ni ra sa kaukauwa mai na meca."

17 Sa dedeka na ligana o Saioni, ia, sa sega e dua me vakacegui koya; Sa vakarota o Jiova ena vuku i Jekope, ni o ira kece sa tiko voliti koya me ra kena meca; Sa ka dukadukali sara o Jerusalemi ena kedra maliwa.

18 "Sa dodonu o Jiova, Au sa vuki tani mai na nona i vakaro. Dou rogoca, oi kemuni kece na tamata, Ka raica na noqu rarawa O ira na noqu goneyalewa sega cala, O ira na noqu gonetagane qaqa, Era sa kau vakabobula.

19 "Au sa kacivi ira na noqu daulomani, Era sa vakaisini au; O ira na noqu bete kei ira na noqu qase, era sa ceguva tiko nai otiti ni nodra i cegu mai na koro Ni ra sa vakasaqaqara kakana tiko, Me ra bula kina.

20 "I Jiova, moni raica, au sa veilecayaki tiko, Sa leqa vakalevu na yaloqu; Sa veisautaki e lomaqu na yaloqu, Au sa rui tamata murimuri lomaqu, Au sa tu e tautuba E vale sa vaka ga na mate.

21 "Era sa rogoca na noqu cegu levu Sa sega ga ni dua e mai vakacegui au O ira kece na kequ meca era sa rogoca na noqu leqa; Era sa marau ni kemuni sa cakava ogo Ni kauta mai na siga o ni sa yalataka, Me rawa kina ni ra vakataki au talega.

22 "Me ra lako kece mai e matamuni na nodra caka cala, Mo ni cakava vei ira na ka era cakava vei au Na noqu talaidredre kece; Au sa cegu oca, Sa malumu talega na yaloqu."

CHAPTER 2

O Jiova sa vakarurugi ira na goneyalewa ni Saioni Ena o ni Nona cudru! Sa viritaka sobu mai lomalagi ki vuravura Na totoka kei Isireli, Sa sega ni nanuma nai butubutu ni yavana Ena siga ni nona cudru.

2 Sa tiloma oti o Jiova ka sega ni kauwaitaka Nai tikotiko kecega i Jekope Sa viritaka sobu ena nona cudru katakata na bai ni valu cecere nodra na goneyalewa e Juta; Sa kauti ira sobu ki ra; Sa vakacataka na nodra matanitu na turaga lalai.

3 Sa musuka laivi o koya ena nona cudru katakata Nai leu kece e Isireli; Sa vakadaroya na cakacaka ni ligana i matau Mai vei ira na meca Sa vakamai Jekope me vaka na buka caucaudre Sa veikamayaki.

4 Sa tucake tu me vaka na meca, sa loveca na nona dakai; Ena ligana i matau, me vaka e dua na meca, Sa vakamatei ira kecega o koya, me vaka sa vinakata e matana; Ki na nodra vale na gonetagane ni Saioni, Sa sova yani na Nona cudru me vaka na bukawaqa.

5 O Jiova sa vaka na meca, Sa tilomi Isireli Sa tiloma kece na vale vakatui; Sa vakacacana na bai ni valu, Sa vakalevutaka na tagi kei na tagi yaso vei ira na goneyalewa

e Juta.

⁶ Sa cakava vakaukauwa na ka ni vale ni veitavaki me vaka ki nai teitei; Sa vakarusa na Nona vale ni soqoni vata; O Jiova sa vakavuna me ra guilecava na Solevu e Saioni E na nona cudru katakata, sa besetaki ira kina na tui kei na bete.

⁷ O Jiova sa cata na Nona i cabocabo ni Soro, Sa biuta na Nona Vale Tabu; Sa laiva tu na bai ni vale ni tui ki na ligadra na meca Era sa vakatubu ue ena vale i Jiova Me vaka na siga ni solevu.

⁸ Sa nakita o Jiova me vakarusa na bai e nodra na goneyalewa e Saioni Sa dodoka yani e dua na wa; E se sega tikoga ni vakasuka na ligana mai na veivakarusai: Na bai kei na i keli e rau sa ceguoca ka tagi vata.

⁹ Sa buluti na kena matamata ni bai ni koro Sa musumusuka ka vakarusa na kena bai kau; Na kena tui kei na kena turaga sa wili vata kei ira na veimatanitu; Sa sega nai vunau, ka sa sega na raivotu vei ira na parofita mai vua na Kalou.

¹⁰ Na nodra qase na goneyalewa ni Saioni, Era sa dabe tu e ra ka, era sa galu tu; Era sa biuta na soso ki na uludra Era sa vakaisulu ena sulu taga, O ira na goneyalewa sega cala ni Jerusalemi era sa cuva ki na qele.

¹¹ Na wai ni mataqu sa vakavuna me'u bobo tu ga, Sa yavavala na yaloqu; sa sega na yate dei Ni ra sa vakacacani na neimami goneyalewa, E na veislatu era sa ciba tu na gone kei ira na dramidrami.

¹² E ra sa kaci tiko vei tinadra, 'E vei na madrai kei na waini?' E ra sa malumalumu me vaka e dua sa vakamavoataki vakaca sara ena veislatu ni koro, Ni ra sa liu yani ena lomaserei tinadra.

¹³ Me'u lomani iko beka vakacava? Me'u vakatauvatataki iko beka kei na cava, O iko na goneyalewa ni Jerusalemi? Me'u vakatauvatataki iko kei cei, me rawa ni vakacegui iko kina, na goneyalewa sega ni cala ni Saioni? Na nomu vuca mai sa tete me vaka na wasawasa; O cei ena vakabulai iko rawa?

¹⁴ Na nomudou parofita era sa raica vei kemudou na raivotu e lasu ka veivakacalai; Era sa sega ni vakaraitaka na nomudou caka cala, Me ra kau lesu mai na nomudou bobula, Era raica tikoga na veika e veivakacalai kei na parofisai lasutaki kei na tadra ni kana levu.

¹⁵ O ira kecega sa lako sivia na vanua ogo, era sa kuretaki liga ga, era sa kuretaki ulu ga vei ira na goneyalewa ni Jerusalemi: "Sai koya beka dina ogo na koro 'sa dau cavuti kina na totoka kei na sega ni vakamelei, Na reki ni vuravura taucoko'?"

¹⁶ O ira kece na kemu meca era sa dolava na gusudra vakaca vei iko; Era sa vakasequruquru bati. Era sa tukuna, "keimami sa tilomi ira oti! Sa dina, ogo sara ga na siga keimami sa waraka tiko; Keimami sa qai kunea, keimami sa qai raica!"

¹⁷ O Jiova sa cakava na ka sa nakita oti; Sa vakayacora oti na Nona vosa Sa dau vakarota o koya ena veigauna sa oti, Sa viritaka sobu o koya, ka sa sega ni yalolilai kina, Sa vakavuna o koya me reki na Meca ena vukumu.

¹⁸ Era sa kacivi Jiova ena yalodina, "Oi kemudou na lalaga ni nodra na goneyalewa ni Saioni, Me ra veicicivi sobu na wai ni mata ena siga kei na bogi; Mo kua ni vakacegui tiko; Mo kua ni kune vakacegu tiko.

¹⁹ Sa vakacerecerea na nodra kaukauwa na meca, "Tucake ka kaci tagitagi yani ena bogi taucoko, Mai nai vakatekivu ni yadrayadra; Sova yani na yalomu ki veikoya, ena vuku ni nodra bula na nomudou gone lalai era sa ciba tu ena via kana ena veislatu."

²⁰ "Raici Jiova, ka vakanananu mada! O ni sa cakava ogo vei cei? Me ra laukana beka na gone mai vei tinadra, O ira na gone era sa keveta tiko? Me ra sa vakamatei beka na bete kei ira na parofita ena vale tabu i Jiova?

²¹ "O ira na gone kei ira na qase era sa veidavori tu ena sala; O ira na goneyalewa kei ira na gonetagane era sa vakamatei ena seleiwau; O ni sa vakamatei ira ena siga ni Nomuni cudru, Sa sega tale na lomaloma rua, ena Nomuni sa veivakamatei.

²² "O ni sa sureti me vaka ki na kana magiti Na ka rerevaki sa vakavolivoliti au, Ena siga ni cudru i Jiova Sa sega e dro bula O ira kece au sa vakatubura ka susuga cake, Era sa vakarusai kecega mai vei ira na meca."

CHAPTER 3

Sai au na tamata sa raica na veivakararawataki sa vakayacora na Kalou ena nona i titoko ni rarawa katakata.

² Sa liutaki au o koya ka sa cakava me'u lako ena butobuto ka sega ena rarama.

³ Io, na ligana sa veicoqacoqa tale kei au ena veigauna kecega ena siga taucoko.

⁴ Sa qase mai na yagoqu, na kuliq talega, sa musuka na sui qu.

⁵ Sa tagavi au me vesuki au, ka sa vakavoliti au ena veivakaisini kei na ca.

⁶ Sa biuti au o Koya ena vanua butobuto me vaka e dua sa mate makawa tu.

⁷ Sa sogoti au o Koya me'u kua ni dro bula: sa cakava o koya me vakabibitaki na kequ i vesu.

⁸ Ni'u sa tagi mada ga ka kaila, sa sogota o Jiova na noqu masu.

⁹ Sa sogota na noqu sala ena vatu; sa vakavevea na noqu i lakolako.

¹⁰ Sa cakava me'u vaka e dua na manumanu kila sa davo tiko me waraka na kena, Sa vaka na laioni sa toka vakarau.

¹¹ Sa vukica tani o Koya na noqu sala, ka sa basubasuki au vakalalai.

¹² Sa loveca na nona dakai, ka sa dodoka na nona gasau me vakadodonu mai vei au.

¹³ Sa vakayacora me lako mai vakadodonu na nona gasau titi me basuka na ketequ.

¹⁴ Au sa yaco me nodra i vakalasa na tamata" me'u nodra sere ni veivakalialiai ena siga taucoko.

¹⁵ Sa vakasinaiti au ena yaloca, sa vakagunuvi au ena kau wiwi.

¹⁶ Sa vakaramusutaka na batiqu ena vatu ka sa buluti au ena dravusa.

¹⁷ Sa vakayawataka na yaloqu mai na vakacegu, au sa sega ni nanuma kina na vinaka ni siga ni mataka.

¹⁸ Au sa tukuna kina, "na noqu kaukauwa kei na noqu vakanuinui sa vakayali mai vua na Kalou."

¹⁹ Mo ni nanuma na noqu vakararawataki ena noqu veilakoyaki tiko kei na kau wiwi e tubu cala.

²⁰ Na yaloqu e se nanuma tikoga ka sa luvu talega e lomaqu.

²¹ Au sa qai nanuma tale oqo, ka au sa kila ni se tiko vei au na vakanuinui.

²² E na vuku ni loloma vakavuqa ni Kalou, eda sa sega kina ni vakaoti Ni sa sega ni mudu na nona loloma.

²³ Era sa vou tiko ga ena veimataka; Sa rui levu ka cecere na Nomuni yalodina.

²⁴ "Sa noqu i votavota o Jiova sa tukuna na yaloqu," O koya oqo au sa nuitaki koya kina!"

²⁵ Sa vinaka na Kalou vei ira sa waraki koya, Ki na yalo ga sa vakasaqarai koya.

²⁶ Sa vinaka vua na tamata me waraka tikoga vakamalua na veivakabulai i Jiova.

²⁷ Sa vinaka vua na tamata me colata nai vua ni se cauravou tiko.

²⁸ Me tiko duadua ka tiko vakamalua, ni sa vakatikora oti vua o Jiova;

- 29 Me biuta na gusuna kina kuvu ni soso”me dua beka kina nai nuinui.
- 30 Me solia na baluna ka dua vua sa sabici kaya, ni sa sinai ena sega ni veiciqomi.
- 31 O Jiova ena sega ni biuta vakadua sara,
- 32 E dina ni sa vakaraitaka na rarawa, ia ena vakaraitaka tale na loloma me vaka na kena sa rui levu na nona yalololoma.
- 33 Sa sega ni dau veivakamavoataki vakailoa o kaya, se dauveivakayalobibitaki vei ira na luve ni tamata.
- 34 Me butu qaqi ira ena ruku ni yavana, o ira kece na kaivesu e vuravura,
- 35 Me vukica tani na lewa dodonu me nodra na tamata, ena matai kaya sa cecere sara,
- 36 Me vakagolea tani na tamata mai na nona i lakolako”sa sega ni vakadonuya o Jiova.
- 37 O cei oqo sa vosa tiko ka sa yaco, ni se bera ni vakatara me yaco o Jiova?
- 38 Sa sega beka ni lako mai na gusu i Jiova na ca kei na vinaka talega?
- 39 Ena cava era sa dau vakaulubale kina na tamata bula, Na tamata sa totogi ga me baleta na nona i valavala ca?
- 40 Me da lako mada ka vakaraica tale na noda i lakolako, ka me da lesu tale vua na Kalou;
- 41 Me da laveta cake na ligada kei na yaloda vua na Kalou sa tiko mai lomalagi.
- 42 Keimami sa talaidredre ka lako tani; o na sega ni vosota.
- 43 O ni sa ubi Kemuni ena cudru ka vakasaqarai keimami; O ni sa veivakamatei ka sega ni loloma.
- 44 O ni sa ubi Kemuni ena o, me kua kina ni lako vei kemuni na masu.
- 45 O ni sa cakava me keimami sa dukalevu kai benubenu e matadra na tamata.
- 46 Era sa dolava na gusudra vei keimami na meca.
- 47 Na rere, na veicoriti, na veivakacacani kei na veivakarusai sa lako mai vei Kemuni.
- 48 Sa drodro vakalevu na wai ni mataqu, me baleta na nodra sa vakarusai tiko na goneyalewa ni noqu tamata.
- 49 Sa drodro tu ga na wai ni mataqu, sa sega ni muduki rawa,
- 50 Me yacova sara ni sa rai sobu mai na Kalou me kila.
- 51 Na wai ni mataqu sa vakaleqa vakalevu na yaloqu me baleti ira na goneyalewa ni noqu koro.
- 52 O ira na meca era sa vakasasataki au me vaka e dua na manumanu vuka ni sa sega na vuna.
- 53 Era sa vakagalui au tiko ena loma ni qara, ka vakaviriki au ena vatu.
- 54 Sa vakadrodroi mai uluqu na wai, au sa tukuna kina "ni'u sa oti vakadua!"
- 55 I Jiova, au sa kaciva yani na Yacamuni, mai na boto ni qara.
- 56 O ni sa rogoca na domoqu, "mo ni kua ni vakadidi vara ki na noqu tagi, na noqu tagica na veivuke."
- 57 O ni sa voleka sara ena noqu tagi yani, o ni a tukuna kina, "me'u kua ni rere!"
- 58 I Jiova, o ni sa cakacaka vakaukauwa ena vuku ni yaloqu; o ni sa kauta lesu tale mai vei au na bula.
- 59 I Jiova, o ni sa kila se'u a leqa vakacava; mo ni raica ka lewa ga.
- 60 O ni sa raica kece na nodra yaloca, Na nodra nakinaki me baleti au.
- 61 I Jiova, o ni sa rogoca na nodra veivakacacani na ka kece era tuvana me baleti au,
- 62 Na tebenigusudra na meca, kei na nodra vakasolokakana ena vukuqu ena siga

taucoko.

⁶³ Mo ni raica ga na nodra dabe kei na nodra tucake; era sa seretaki au ena nodra sere ni veivakacudrui.

⁶⁴ I Jiova, Mo ni sauma lesu vei ira me vaka na cakacaka ni ligadra.

⁶⁵ Mo ni solia vei ira na yalo sa ubi tu. Na Nomuni veivakaloucataki me sa tu vei ira!

⁶⁶ E na Nomuni cudru, me sa cici muri ira, ka vakarusai ira, ena ruku i lomalagi i Jiova.

CHAPTER 4

Na kena buwawa mai na koula! Na kena veisau na koula dina! Na veivatu ni vale tabu sa vakakabuwacarataki “ Ena vei tutu kece ni sala.

² O ira na gonetagane digitaki ni Saioni Era sa sau levu me vaka na koula dina. Era wili ga me vaka na kuro qele, Na cakacaka ga ni dua na dau tuli kuro!

³ O ira mada ga na koli ni veikau, era sa vakaraitaka na sucudra vei ira na luvedra; O ira na goneyalewa era sa ca sara, me vaka na toa ni veikau ni vanua liwa.

⁴ Na yamedra sa gone lalai sa kabita na lomadra ena tagi. Era sa tagica na madrai na gone, ia sa sega e basuka vei ira.

⁵ O ira sa dau kana ka kusikusima, Era sa yali ena sala O ira era sa kaucake mai ena lokaloka Era sa roqoroqo binibini dravusa.

⁶ Na i totogi ni cakacaka ca era sa cakava na goneyalewa mai noqu koro sa levu cake mai nai totogi ni valavala ca mai Sotoma O o koya sa vakacacani kina vakasauri ka sa sega tale na tamata me veivuke rawa!

⁷ O ira sa biuti ira vakatikitiki me ra sa nona na Kalou, era sa serau me vaka na uca vulavula, vulavula sivia mai na sucu; Era sa damusa sivia me vaka na rupi Era sa vaka na safaia O na kedra i rairai.

⁸ Na kedra i rairai sa loaloa sivia mai cake. Era sa sega ni kilai ni ra sa lako tu ena sala. Sa kabi na kulidra ena nodra sui Era sa vaka na buka mamaca.

⁹ Era sa vinaka cake o ira sa vakamatei ena i seleiwau, mai vei ira sa mate ena viakana; Era sa saiwaruta, vakaleqai vakalevu ni sa sega na vuata ni vanua.

¹⁰ Na ligadra na marama vinaka, era sa vakasaqara na luvedra me kakana. Oqo gona na nodra vakarusai na goneyalewa ni noqu koro.

¹¹ O Jiova sa vakayacora ga na nona cudru katakata, Sa sovaraka na nona cudru, Na bukawaqa mai Saioni, sa vakarusa na kena yavu.

¹² O ira na tui e vuravura kei ira na lewei vuravura era sa sega sara ga ni vakabauta, ni rawa ni ra curuma rawa na matamata kei JerusalemiO

¹³ Ena vuku ni nodra i valavala ca na bete kei na parofita, Sa vakadavei kina na nodra dra nai valavala dodonu ena kedra maliwa.

¹⁴ Era sa mataboko ka vakayayamo voli ena vei gaunisala. Era sa vakadukadukali-taki ira ena dra Sa sega kina ni dua e via tarai ira.

¹⁵ Era sa kacivaka yani, "Mo lako tani, dukalevu! Lako tani, lako tani, Kua ni tarai keimami mai!" Ni ra sa dro ka veilakoyaki voli O ira na kai tani era sa tukuna, "Me ra kakua ni tiko vata kei keda."

¹⁶ Na mata i Jiova sa vakasesei ira; Sa sega tale ni via wiliki ira, Na tamata era sa sega ni via doka na bete se me vakarokorokotaki ira na qase.

¹⁷ Sa sega yaga na matai keimami Ni keimami sa sega ni raica rawa na veivuke.

¹⁸ Era sa vakaraica tiko na neimami kalawa Me keimami kua ni lako rawa ena gaunisala.

Sa voleka na neimami cavacava; Sa oti na neimami veisiga, Sa lako mai na neimami cavacava.

¹⁹ O ira na meca, era sa matai sara mai vei ira na ikeli ni veiyasana vakalomalagi, era sa lako mai na veiulunivanua ka siro mai ki na vanua liwa me waraki keimami.

²⁰ Nai cegu ena ucui keimami, Nai lumuti ni Kalou, Era sa vesuki ena qara, O koya keimami sa tukuna kina, "Ena ruku ni yaloyalona Keimami na bula kina ena kedra maliwa na veimatanitu."

²¹ Reki ka marau tiko, o iko na goneyalewa ni Itomi, O iko sa tiko mai Usi! Na bilo ena soli yani vei iko O na mateni ka vakaluvawaletaki.

²² Na vakatotogitaki ni nomu caka cala, sa vakaoti Oi kemudou na goneyalewa ni Saioni Ena sega tale ni vakatalai kemudou o Jiova me vakabobulataki tale. Era totogitaka na nomudou caka cala na goneyalewa ni Itomi; Era vakaraitaka na nomudou i valavala ca!.

CHAPTER 5

I Jiova, mo ni nanuma na ka sa yacovi keimami; Mo ni raica, io, na neimami vakacacani!

² Na neimami votavota sa soli vei ira na vulagi kei na neimami veivale sa soli vei ira na kai tani.

³ Keimami sa luveniyali kei ira na tinai keimami era sa yada.

⁴ Keimami sa sauma na wai keimami gunuva kei na neimami kau talega sa volitaki.

⁵ Keimami sa cemuri ka cakacaka tiko ka sega ni vakacegu.

⁶ Keimami sa solia na ligai keimami vei ira na kai Ijipita kei ira talega na kai Asiria, me keimami vakamamautaki kina ena madrai.

⁷ O ira na tamai keimami era sa i valavala ca, ka era sa yali tani, Keimami sa mai colata na kena ca.

⁸ Era sa mai lewai keimami na dauveiqaravi, Sa sega e tu me vakabulai keimami mai na ligadra.

⁹ Keimami rawata vakadredre na keimami madrai, Baleta nai seleiwau mai na vanua liwa.

¹⁰ Sa katakata na yagoi keimami me vaka na lovo, E baleta na tauvimate ni via kana.

¹¹ E ra sa rawai vakaukauwa na yalewa ni Saioni, O ira na vada talega ni veikoro e Juta.

¹² Era sa vakaliligi tu na turaga ena ligadra kei ira na qase era sa sega ni dokai.

¹³ O ira na cauravou era sa tala vatu kei ira na gonetagane era sa taceba ena cola kau.

¹⁴ O ira na qase, sa mai oti na nodra dau mai sotasota ena matamata ni koro, O ira talega na cauravou, sa mai oti na nodra dau mai qiriqiri.

¹⁵ Na reki ni yaloi keimami sa mai oti; Na neimami dau meke sa vuki me so mate.

¹⁶ Sa lutu tani mai ului Keimami nai sala ni veiliutaki, Na ca levu veikeimami ni keimami sai valavala ca!

¹⁷ Oqo na vuna, keimami sa yalolilai kina, ka sa malumu sobu na rai ni matai keimami;

¹⁸ Sa lala na ulunivanua o Saioni ka era lako tu kina vakaveitalia na fokisi.

¹⁹ Io, sai Kemuni Jiova, sa tudei ka sega ni mudu; Na Nomuni tikotiko vakaturaga sa ka mai na dua nai taba tamata kina dua tale nai tabatamata.

²⁰ Ena cava o ni sa guilecavi keimami kina, ka biuti keimami vakadede kina?

²¹ Mo ni vakalesui keimami tale vei Kemuni, Jiova, keimami na qai vakatikori lesu tale; me

vakavoui tale na neimami veisiga me vaka e liu,

²² Vakavo ga kevaka o ni sa besetaki keimami vakadua. Ka cudruvi keimami vaka ca sara!

For other languages please go to www.wordproject.org